

**Grad Novi Pazar**  
**Skupština grada**  
**Odbornička grupa SDA Sandžaka**  
**Novi Pazar**  
**3. septembar 2023. godine**

**P R E D S J E D N I K U**  
**SKUPŠTINE GRADA NOVOG PAZARA**

Na osnovu člana 44. stav 1. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 109. stav 2. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo prijedlog **da se iz predloženog dnevnog reda 4. sjednice Skupštine grada Novog Pazara zakazane za 4. septembar 2023. godine, povuče tačka 6. Prijedlog Odluke o davanju saglasnosti na Odluku o povećanju cijena vode i kanalizacije JKP „Vodovod i kanalizacija“ Novi Pazar**

**O b r a z l o ž e n j e:**

Predložena odluka kojom se namjeravaju povećati cijene usluga JKP „Vodovod i kanalizacija“ za isporučenu sanitarnu vodu i odvođenje otpadnih voda predstavlja nastavak politike koja svoj neuspjeh u upravljanju javnim preduzećima, i gradom uopšte, pokušava da nadomesti nerealnim podizanjem cijena usluga koje pružaju.

Aktuelna vlast u Novom Pazaru odgovorna je za loše stanje u kojem se nalaze javna preduzeća, za njihov nezakonit rad i nesposobnost da kvalitetno obavljaju poslove za koje su osnovana i osiguraju nesmetano funkcionisanje svih vitalnih komunalnih sistema u gradu, a jedan od njih je svakako proizvodnja i distribucija vode i odvođenje otpadnih voda.

Postojeća ekonomska situacija u gradu i veliki negativni nesrazmjer u odnosu prosječne zarade i prosječne potrošačke korpe jedan je od argumenata zašto ne treba dopustiti povećanje cijena.

Građani niti mogu iz finansijskih razloga, a još manje trebaju da svojim novcem plaćaju greške, propuste, nemarnost i nestručnost onih koji danas upravljaju gradom i javnim preduzećima.

Pored toga, važno je istaći da se u Izvještaju o poslovanju Javnog komunalnog preduzeća „Vodovod i kanalizacija“ za 2022. godinu, na strani 8, navodi da je u 2022. godini evidentirano 25.218 korisnika, odnosno 647 korisnika više u odnosu na 2021. godinu kada je evidentiran 24.571 korisnik, a da je u 2021. godini naplaćeno 295 miliona i 555 hiljada dinara, dok je u 2022. godini naplaćeno 293 miliona 559 hiljada dinara. Kada govorimo o ovome ističemo da je u 2022. godini došlo do povećanje cijene vode u odnosu na cijenu vode u 2021. godini. Dakle i pored većeg broja korisnika u 2022. godini u odnosu na 2021. godinu, u 2021. godini naplaćeno je 2 miliona dinara više.

Ovi podaci govore da povećanje cijene vode negativno utiče na procenat naplate i da to nije put kojim treba da se ide.

Evidentno je da JKP „Vodovod i kanalizacija“ ima ozbiljne probleme u funkcinisanju i obavljanju osnovne djelatnosti zbog koje postoji, bilo da su u pitanju gubici vode odnosno činjenica da se od ukupno proizvede vode fakturiše samo 36,59 % (kako je navedeno na strani 8 izvještaja za 2022. godinu) ili je u pitanju sistem kanalizacione mreže koji je u katastrofalnom stanju, međutim ti problemi neće nestati povećanjem cijena usluga kako to namjerava da uradi vladajuća politička struktura. Problemi se mogu riješiti, ali te problemem sigurno ne mogu riješiti oni koji su te probleme proizveli i sigurno to ne mogu uraditi na način kako je predloženo da se uradi na ovoj Skupštini.

Shodno naprijed navedenom, Odbornički klub SDA Sandžaka, predloženu tačku dnevnog reda vidi kao katastrofalno loš potez koji će stvoriti dodatne poteškoće u funkcionisanju JKP Vodovod i kanalizacija i dodatno opteretiti ionako osiromašene građana, i predlažemo da se tačka dnevnog reda Prijedlog Odluke o davanju saglasnosti na Odluku o povećanju cijena vode i kanalizacije JKP „Vodovod i kanalizacija“ Novi Pazar, povuče sa dnevnog reda.

**Predsjednik odborničke grupe**

Mr. Ahmedin Škrijelj